



Tir Yimyim



TAPAK 7 Yangia anidakangma : **f** Tir Yimyim **i** tiryimiyim@aolima **yt** tir yimiyim **TAPAK 8**
Biden administration-i Congress mekener telemtetba agi

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com



Hasaranga Sri Lanka T20 team captain kumogo

VOL. XXI NO. 80 (ADOK 80) DIMAPUR AMUNGNÜ (SUNDAY) LUCHII (DECEMBER) 31, 2023 ₹ 5.00

Naga yimten telok asem longjemtsü

Dimapur, December 30, 2023 (TYO): 2024 nungi Naga yimtenren telok asem külemi tarutsü yimten mapa inyaka aotsü.

Honibarnü NSCN (Akato), NSCN (Khango) aser NNC (Z. Royim) lennirtem senden ka amendang iba lemtet agi.

"Onoki joint military exercise agitsü aser kasa tangatetba aliba teloktem adentsü jaoker" ta NSCN lennir Akato-i ashi.

"Iba teloki Centre dang yimtenren olemtep tenzüksü atema asungdangtsü aser telangzüba tajung angutsü imlar" ta Akato-isa ashi.

Manipur nung Police Commandos amak

Imphal/New Delhi, December 30, 2023 (Agencies): Manipur kübok Moreh nung Honibarnü telungpurtem aser police commandos tsungda khatep.

Moreh nungi police convoy ka aodang telungpurtemi injang khaloktsü. Idangji commando ka yiru aser pa Assam Rifles camp

ka nung anepaludar. Moreh nung iba lending atalokba atema ki ana rongdoktsü ta osang angazüker.

Tanü ano tanga tatalokba ka nung Manipur kübok Kangpokpi district nung mejangjatetba nisungtemi lanur ka khaset. Honibarnep 2:30 ako meta iba lendong ya atalok.

3 buba National Conference of Chief Secretaries agi



Chief Secretary, J. Alam IAS den Development Commissioner of Nagaland Ramakrishnan IAS, Principal Secretary PHED M Patton IAA aser Principal Director School Education Thavaseelan K. IAS nunger külemi agiba noksa ka angur.

Dimapur, December 30, 2023 (TYO): December 27-29, 2023 tashi New Delhi nung 3 buba National Conference of Chief Secretaries nung Nagaland Chief Secretary J. Alam IAS aden.

Iba sentong nung Nagaland Development Commissioner Ramakrishnan IAS, Public Health Engineering Department Principal Secretary M Patton IAS aser School Education Principal Director Thavaseelan K. IAS nungertem aden.

December 28 & 29, 2023 anogotem Prime Minister Narendra Modi-i national conference nung menden ser agi.

Iba mungdang nung tongtipangba ranglokji 'Ease of Living' liasü aser anogo asemnü mungdang nung nisung 200 tema aden, ta Deputy Director IPR &

IA, Nagaland House New Delhi-i sangdong ka nung metetdaksü.

Mungdang nungsa health care, school education, drinking water, electricity aser land records & building permissions indang onüktem benoka lemsatetp.

Maneni, Cyber Security, Aspirational Block and District Programme, Rationalisation of Schemes aser New Age Technologies indang special sessions agi.

3 buba National Conference of Chief Secretaries nungsa Drug De-addiction & Rehabilitation; Amrit Sarovar; Tourism Promotion; Branding & Role of States, PM Vishwakarma Yojana aser PM SVANidhi atema tebilembatem lemsatetpa liasü.

Minister Imna Along-i "Minister of the Year Award" agizük



New Delhi, December 30, 2023 (TYO): Tourism & Higher Education Minister Temjen Imna Along-i "Minister of the Year Award" agizükogo.

Iba sempet ya Confederation of Indian Universities (CIU), The Educational Standards and Testing Council of India (TESTCOIN) aser United Nations affiliated International Association of Educators for World Peace (IAEWP) külemi longjemer agütsür.

India International Centre, New Delhi nung India aser bendanger ketdangsurtem lia Minister Along-i iba sempet agizük.

"Creation of World Class Universities: Prospects, Constraints, Challenges and Dimensions" indang National Seminar nung pai iba sempet agizük.

Minister Along-i Nagaland indang kaket ka sayatsü aser Principal Author Dr. Priyaranjan Trivedi nem tenüngsang agütsü.

Paisa Vice Chancellors aser bendanger ketdangsurtem dang Nagaland semdangtsü atema jaok.

Iba sentong nung IAEWP Chancellor President Dr. Priyaranjan Trivedi, All India Institute of Medical Sciences Director Dr. M. Srinivas, Amity University Gurugram Vice

Chancellor Prof. P. B. Sharma, Jamia Hamdard University Vice Chancellor Prof. M. Afsar Alam, Haryana Skills University Vice Chancellor Prof. Raj Nehru, Additional Chief Secretary & Chief Resident Commissioner of Nagaland Jyoti Kalash, IAS, The Global Open University Nagaland Chancellor Dr. S. N. Pandey, Ethiopian Government Representative Feven Kassahun aser Confederation of Indian Universities (CIU) Director & The Educational Standards and Testing Council of India (TESTCOIN) Dr. Utkarsh Sharma nunger aden.

Naga Hoho küm 25 jubilee among; Longjemtsü ayongzüker



Kohima, December 30, 2023 (TYO): Naga Hoho tenteter küm 25 ajungba sentong ka Honibarnü ayonga agiogo.

Naga Hoho ya 1998 nung 'unity and fraternity' omen nung ajemdaker tentet. Naga Hoho nung India kübok state 4-Arunachal Pradesh, Assam, Manipur aser Nagaland den Myanmar kübok tesem kar densema lir.

Naga nunger telungpur telok balala tsungda khatepa atema shisabulua bilema Naga kin teloktemi Naga Hoho tentet aser rara anentsü atema mapa inyaka aru. Naga Hoho-i India sorkar den Naga yimten tebilemstü latettsü atema mapa yimjung olemtep tenzükba nung yaritep.

"Asenoki küm 25 tsungda ajangtetbatem atema pelateptsüla saka ano tamakoktem atema tenüng agitsüla" ta taoba Naga Hoho tir Keviletuo Kiewhuo-i

ashi. "Naga Hoho tenzükertemi parnok tajungtiba agi inyak aser Naga nunger külemi longjemtsüba den tsükchir masü saka medemer yimteptsü mangdang ayu. Ajisüaka tanü Naga Hoho lemsar aser Naga kintemi Central Nagaland Tribes Council, Eastern Nagaland Peoples' Organisation, Tenyimi Union Nagaland amala teloktem tenzükertem" ta pai ashi.

Naga Hoho ya Naga kintemi tenzük saka khenkhen kintem indang khuret atema meinyak aser iba jagi parnok Hoho nung madentsüsa aküm ta Keviletuo Kiewhuo-isa ashi.

Naga Hoho nung tang teinyakdak ketdangpurtemi Hoho tangatetba nung ajemdaker inyakba atema tenüngsang agütsür aser maneni iba tangatetba nung inyaka aotsü ayongzüker ta paisa ashi.

"Naga nunger longjema mali aser asenoki jenjang temabai atutsü atema longjemtsüla. Naga yimten tekaraba nung latettsü atema asenok ka akümstüla" ta Kiewhuo-isa ashi.

"Iba benjung ajanga Naga nungeri tarutsü putu atema sentong tajung renemtsü maongka agitsüla" ta Forum for Naga Reconciliation Convenor Rev Dr Wati Aier-i ashi.

Naga Hoho tenzükba mapang pungmangji Naga nunger ajak atema liasü. Asenok kin balala lir saka longjemtsü atema kati ka meimtsüla aser amalitep alitsüla ta pai ashi.

Iba sentong nung United Naga Council Manipur, Naga Hoho of Arunachal Pradesh, Zeliangrong-Rengma Joint Council Assam, Naga Students' Federation, Naga Mothers' Association aser Naga Peoples' Movement for Human Rights ketdangpurtemia o jemi.

Naga nunger loktitentet aika lir aser asenok joko ojang dang lemsatsüla. Naga nunger longjemtsüla aser Naga Hoho tashi itdaksütsüla ta tejembir balalai ashi.

Naga Hoho tir H. K. Zhimomi-ia tetenzükertem senmang nung ammettsü aser tanü lennirtemi Naga Hoho yanglushitsü aser tashi itdaksütsü atema longjemtsüla ta ashi.

Naga yimten tekaraba nung latettsü atema Naga nunger longjemtsüla ta H. K. Zhimomi-isa ashi.

METETDAKTSÜR
Tanü December 31, 2023 anogo nungi sangküm 2024 küm January 2 tashi Tir Yimyim nung inyakerkem küm tasen sodi agir, anungji taruba January 04, 2024 Adok nungi dang Tir Yimyim angutsü. Iba 2024 küm tasen asenok ajaki taküm tajung nung ngutettsüsa sarasadema atadi.
Tir Yimyim azünger aser meimertem ajak dang tepela küm tasen salem jelia metetdaksür.
- Yimozülur

Chhattisgarh nung Adivasi lenir ka apu



Guwahati, Luchii/December 30 (Agencies): Forum Against Corporatization and Militarization (FACM)-i, Hasdeo Aranya Bachao Sangharsh Samiti (HBSS) züngsem ka Chhattisgarh nung apuba aitsüogo.

FACM-i sangdong ka ajanga HBSS lenir ya tangsa tang chioktsü takhangba agütsüogo aser lokti tentet balala züngsemtem, activist tem, kaketshirtem, democratic organization tem aser yimjung meimba nüburttem ajak dang Adivasi nungertem den nokdaktsü asoshi mepeshia metetdaksüogo.

"Adivasi nunger lenir ka apuba ya pei ali aser libaliro kümzuka ayutsü atema nokdakertem ajema ajema kümdaktsütsü merangba tatishitsü ka lir. Onoki sorkar

dang Adivasi nungertem temeden akümtsübuttsü aser PEKB project tangsa tang anentsü akhanger," ta FACAM otongdar kati ashi.

Parnokisa iba amla inyakyim anema nokdakba pusemstsü atema linük ajunga nung rally ayongzuka agitsü ayongzükogo.

Chhattisgarh nung coal mine project ka anema nokdakba Hasdeo Aranya Bachao Sangharsh Samiti (HBSS) züngsemtem aika December 21 nü puogo.

Parsa East Kete Basen (PEKB) project anema longkak aita aliba mapang tang lenirtem ya puogo.

Rajasthan Rajya Vidyut Utpadan Nigam Limited (RRVUNL) meyong PEKB project koba Adani Group-i achaayanger iba project ya Adivasi nungertem anema

nokdakba sülen taoba küm anena liasü. Chhattisgarh Assembly-ia 2022 küm July ita bangzüng ka agizük aser Hasdeo tesem nung mining inyakyim kecha benoka minyaksü ta ashi.

Assembly nung bangzüng agizükba den tang ken o benoker liaka December ita Bharatiya Janata Party (BJP) puri election akokba sülen Adani teloki inyakyim tenzuka liasü. Company-i machine telutem yok aser arem achiba mapang tekümzükba agütsütsü asoshi Central Reserve Police Force (CRPF) 5,000 yoka liasü.

Tawa HBSS lenir Ramlal Kariyam, Jainandan Porte, aser Thakur Ram nunger apuba ya iba tesem nung Adivasi nugertem iba project anema nokdakba dak sendaka lir, ta FACM-i ashi.

Manipur: Telungpurtemi security forces amak; police ka yiru



Guwahati, Luchii/December 30 (Agencies): Honibarnü Tengenupal district kübok Moreh Forest Gate nung telungpurtemi mendanga atar security force maka liasü.

Osang ajanga ashiba agi, telungpurtem yagi nikongtsütsü 3:30 ako shi nung security forces tem ya amak aser iba sülen telok ana tsüngda khatapa liasü. Khatapba mapang commando ka yiruba osang metetdaksüogo.

Yirur aliba sepai ya Manipur Home Department nungi Special Commando ka

lir. Honibarnü Imphal nungi Moreh tsüngda National Highway -102 nung Assam Rifles tem tamendakdak tongtibang ka anasa Kuki nunger telungpurtemi mendanga atar amakba mapang sepaisang ya injang agi yirua liasü, ta police-i metetdaksü.

Kuki nunger telungpurtem yagi Honibarnü nikongtsütsü 3 ako shi nung NH-102 nung Moreh Forest Gate ward number 7 anasa commando temi amshiba bulletproof gari ka bomb ana amshia amak.

Bomb amshia amakba

mapang commando ya tetsüng yirua liasü.

Bomb pokloktsüba sülen commando temia meyiper injang khaloktsü aser telok ana tsüngda khatapa liasü.

October 31 nü sülen Kuki nunger telungpurtemi tang mezüngbuba security force makogo. October 31 nü ya Moreh police station nungi Sub-Divisional Police Officer Chingtham Anandkumar tepseta liasü.

May 3 nü Manipur nung kin o kin tsüngda mangatettep tenzükba sülen mendanga atar amakba ken o aika kümogo.

Kohima nung mejangjaba nisung ka sür lir

Dimapur, Luchii/December 30 (TYO): December 16 nü Kohima nung Ao church anasa mejangjaba tebur (arishi küm 40-45) ka süjia or aliba indang osang agizüka liasü. Osang angazükba sülen pa NHAK ICU-i bener ao ajisüaka December 30 nü anepdang 4 ako shi nung süogo.

Temzüng ozüng dak

ajemdaker tinyaktsü maparen ajak tembanga inyakba sülen tasümgang ya maitsü jangjatsü atema North Police Station morgue nung yua lir.

Iba dak sendakba nung osang tejangjaba agitsü atema North Police Station, Kohima den iba number; 7005986018 ajanga tongteprateptsü metetdaksüogo.

Dimapur Railway Station nung tasümgang ka ngutet

Dimapur, Luchii/December 30 (TYO): December 30 nü 1 akoshi nung NF Railway Dimapur Station Manager nungi tezümluba railway memo ka Govt.

Railway Police Station (GRPS), Dimapur-i agizüka liasü. Shiti ajanga Dimapur Railway Station nung DMR-RXR section aser KM 258/3 na tsüngda mejangjaba nisung ka (arishi küm 40-45) sür aliba metetdaksü.

Osang angazükba sülen duty party iba tesemi ao aser mejangjaba tasümgang (non-local tebur) ka railway track nung sür lia nguteta liasü. Iba nisungba ya train agi menüng asütsü ta temulung meleme bilemer.

Ken o bushisüngdang mapang nisungba maitsü

jangjatsü atema tasümgang ya kanga junga asadangogo ajisüaka identification card mesüra mobile phone kecha mongutet.

Temzüng ozüng kübok tinyaktsü maparen ajak tembanga inyakba sülen tasümgang ya post-mortem examination aser identification atema District Hospital morgue-i benerogo.

Asüsang yagi long pant tanak, anüngsüntsü telung süoshi, tola temesüng aser aut sentüsü T-Shirt ka semer liasü.

Ken o dak sendakba nung kinunger aser medemertem dang Officer-in-Charge, GRPS, Dimapur (Mobile No. 7085055021) den

tongteprateptsü asoshi mepeshia metetdaksüogo.

Manipur: Tribal library 34 Hombarnü nungi yanglu tenzüktsü



Manipur Chief Minister N Biren Singh

Imphal, Luchii/December 30 (Agencies): Sobaliba aser libaliro wazüka ayutsü nükjidong nung digital infrastructure keter züngoksema aliba kintem indang library hall 2024 küm January 1 nü nungi yanglu tenzüktsü.

Manipur sorkari state nung aliba kin balala atema iba amala library 34 yanglutsü atema benokogo. Library ya sen crore 10 shi intoka yanglutsü.

Honibarnü Manipur Chief Minister N Biren Singh-i pa indang office nung sentong ka

agiba mapang ashiba agi, züngoksema aliba kintem indang museum tem taoba mapang yangluogo.

Maneni kin balala indang library hall tem ya museum den atonga yanglutsü aser maparen January nungi tenzüktsü, ta CM-isa metetdaksü.

Manipur nung aliba kin balala indang sobaliba, libaliro, art aser teka mapatem sayutsü aser wazüka ayutsü nükjidong nung iba library ya yanglutsü telemtetba agiogo.

NITI Dimapur shibanga atar

Dimapur, Luchii/December 30 (TYO): NITI Dimapur Center tekolakba Er. Rishav Sethi-i sangdong ka ajanga, küm tasen benjung amungtsü aliba dak sendakba nung NITI (Nationalist Institute of Technology & Innovation) Dimapur Center nung class tem January 1 aser 2 nü magi atatsü, ta metetdaksüogo. Centre ya

January 3, Bodhbarnü nü lapoktsü, ta paisa metetdaksü.

Maneni NITI team-i Nagaland nung aliba nüburttem aser talisa kaketshirtem ajak dang jelia küm tasen salem lemsatpogo. 2024 küm ya alima ajunga aser talisa Nagaland nung aliba nüburttem ajak yimjung nung renloka aotsü imla ataba Sethi-isa lemsatp.



New Delhi, December 30, 2023: Delhi nung mopung menenba anema Honibarnü New Delhi nung BJP MP, Manoj Tiwari den tangartemi Arvind Kejriwal-i aniba sorkar anema longkak aيتدang tangokba noksa nung angur.

Rajasthan nung Cabinet ulushia minister 22-i tenangzükba agi

Jaipur, Luchii/December 30 (Agencies): Honibarnü Rajasthan nung state cabinet ulushia minister 22-i tenangzükba agiogo, ta ketdangsertemi metetdaksü. Rajasthan Chief Minister, Bhajanlal Sharma-i state Angh, Kalraj Mishra ajurua cabinet ulushitsü atema temelaba meshiba sülen mapang tatsüka tsüingda minister tasepurtemi tenangzükba agi. Iba sentong ya Raj Bhavan nung agia liasü. Minister 22 rongnungji cabinet-rank minister 12, Ministers of State (MoS) with independent charge pongu aser ministers of state pongu liasü. Tawa assembly election nung Jhotwara menden nungi takok angusang, Rajyavardhan

Rathore-ia minister Cabinet minister temji Kirodi Lal Meena, Madan Dilawar, Gajendra Singh Khinvasar, Babulal kharadi, Jogaram Patel, Suresh Rawat, Avinash Gehlot, Joraram Kumawat, Hemant Meena, Kanhaiya Lal Chaudhary aser Sumit Godara nung lir aser Ministers with Independent charge tenangzükba agitemji Sanjay Sharma, Surendra Pal Singh TT, Jhabar Singh Kharra, Gautam Kumar aser Heeralal Nagar nung lir aser. Minister of state tenangzükba agitemji Otaram Dewasi, Manju Baghmar, Vijay Singh Choudhary, KK

Bishnoi aser Jawahar Singh Bedam nung lir aser. Cabinet ulushiba dak sendakba nung Rajasthan BJP lenir Rajendra Rathore-i, "Cabinet nungji ajak züingoka lir aser onoki Rajasthan nung taginüba ataloktsütsü," ta metetdaksü. December 15 nü Bhajanlal Sharma-i Rajasthan Chief Minister tenangzükba agia liasü aser Diya Kumari o Prem Chand Bairwa nati Deputy Chief Ministers tenangzükba agia liasü. Tawa agiba Rajasthan assembly election nung BJP-i menden 115 tashi nung takok angu aser Congress-i menden 69 nung dang takok ngua liasü.

Gaza amakba ya meimchir ajak anema inyakba lir: Kerala CM Vijayan

Thiruvananthapuram, December 30 (Agencies): Honibarnü Kerala Chief Minister, Pinarayi Vijayan-i Israel-i Gaza amakba aija, Israel nungertemi Palestine nung anema inyakba ya meimchirtem ajak anema lir, ta metetdaksü. State yimtiba, Thiruvananthapuram nung 91buba Sivagiri temeshi aini aoba sentong lapoktsüdang pai, kodang asenoki Palestine ta jembidir asen melungiang nung Islam yimsü amangertem imdangi arur, ajisüaka Gaza nung Khristantem-a aika lir, ta ashi. Paisa, Khristmas ajanga yimjung osang bener arutsür, ajisüaka Palestine nungertemibo Khristmas benjung memongtet,

ta ashi. "Israel-i Gaza amakdang Khristantema aika süogo, anungji iba ya yimsü ka amangertem amakba dang masü saka meimchir ajak amakba lir," ta pai ashi. West Bank kübok aliba Bethlehem nung takümba Khristmas memongtetba dak sendakba nung pai, "Iba tesem (Bethlehem) nung Khristmas memongtetbaji puti otsü nung tang mezüing asütsü," ta metetdaksü. Varkalai temeshi aini aoba dak sendakba nung pai, Sree Narayana Guru indang osang ajanga iba lima aser parnok (Israel sepaitem) melungiang atong asübo yamai azü metokshila, ta pai ashi.

"Missile amshia amakba ajanga chirepba kiojen nung tetsür-tanur tasüming meyrjang aika angu. Ni iba ya Palestine indang jembir aser Israel-i taochi mesayui Gaza amakba indang jembir ta ajaki meteta dang lir. Yisu Khrista asoba tesem, Bethlehem nung Khristmas benjung mamong. Yisu Khrista asoba tesem nung ki aika raksatsü aser kinü tanur tasüming aika angu. Anungji parnoki kechiba Khristmas benjung mongtetsü," ta paisa ashi. Sivagiri ya state nung temeshi aini aoba tongtibang tesem ka lir. Iba tesem nung loktiliba nung temelenshi adokdaksüsang, Sree Narayana Guru indang leper lir.

Petrol-diesel jenjang atuba atema Priyanka Gandhi-i sorkar aitsür

New Delhi, December 30 (Agencies): Linük nung petrol aser diesel jenjang kanga atuba atema Honibarnü Congress lenir Priyanka Gandhi Vadra-i Centre sorkar sashia aitsüogo. Totzü jenjang kanga atuba atema sorkar aija lai, sorkar atema tongtibangbaji billionaire kar senpong süngtsütsü atema dang lir, ta ashi. Congress general secretary, Priyanka-i Hindi oshi agi 'X' ajanga, tesüiba ita 19 tsüingda International market nung totzü tazü jenjang shilem 29 agi ishiba kümogo, ta ashi. "Ita trok tsüingda totzü

company temi sen 1.32 lakh tajangzük nguogo. Parnoki sen jenti aazükba khuretji linük nüburtem nem agütsür," ta lai tai tongloktsü. Petrol aser diesel jenjang asakba agi linük nung chiyungtsü/osettsüset jenjang kanga tuogo, ta Congress party lenirisa metetdaksü. "Sensakertem aser middle-class nüburtem taküm alitsü kanga saaka kümogo aser parnoki anisüingzük mangur. Sorkar atema tongtibangbaji billionaire kar senpong süngtsütsü atema dang lir," ta lai ashi.



December 30, 2023 nü Ahmedabad nung Gujarat Chief Minister, Bhupendra Patel 'Vibrant Ahmedabad Flower Show 2024' nung adenba noksa nung angur.

Ram tekülem ki semzükba nung yimtenren maitdaksütsüla: Thackeray

Mumbai, December 30 (Agencies): Taoba mapang Maharashtra Chief Minister, Uddhav Thackeray-i, Ayodhya nung Ram tekülem ki semzükba nung yimtenren maitdaksütsüla, ta ashi. Uttar Pradesh kübok Ayodhya nung Ram tekülem ki ya sangküm January 22 nü semzüktsü. Ram tekülem ki semzükba sentong nung adentsü atema Uddhav Thackeray mejaokba nungi yimtenren nung aitsütep tenzükogo. "Ram Lalla ji kü meyong-a lir. Ni melungba mashie mapang ka nung ni semdangtsü akok. Ni tang-a otettsü aser asüing-a otettsü. Ni chief minister akümba mapang nung ni Ayodhya-i ao. Ibaji masüdanga ni Ayodhya semdangogo. Atangji tekülem ki semzükba sentong nung adentsü atema ni mejaok, aser ni ibaji menüingdaker. Kü temepishiba ka dang lir- iba sentong ya yimtenren onük ka meküm daksütsüla," ta pai ashi. Iba sentong nung adentsü atema Uddhav mejaokyonga Maharashtra Navnirman Sena tongti lenir, Raj Thackeray bo jaokogo. Maharashtra deputy chief minister Devendra Fadnavis-i Ayodhya nung Babri Masjid bensatsüba nung pai-a shilem agia liasü aser jail nunga puok,

ta aiben jembiogo, aser ibaji aitsüba olen ka nung Uddhav-i, "Babri Masjid bensatsürtem tanübo yangji mali. Kar dang alitsüa akok. Nisung karbo school picnic atema iba tesem jagi ao asütsüa akok, kechiyong iba mapang nungji parnok kanga tanur dang liasü," ta ashi. Ano külen CPM general secretary, Sitaram Yechury-i, Ram tekülem ki semzükba sentong nung adentsü atema pa jaokogo, saka maotsü kechiyong yimsü dak sendakba ya nija ka tangatetba ta party-i bilemer; anungji Ram tekülem ki semzükba ya yimtenren nung tajangzük angutsü atema hadir ka ama mamshitsüla, ta shiogo. 2019 küm November ita nung Supreme Court-i Ayodhya nung Ram Janambhoomi-Babri Masjid ken o nung tatembangbuba obendang agüja liasü. Iba mapang nungji Supreme Court-i Ayodhya nung Ram tekülem ki asütsü obendang agütsüba den külemi Centre dang Muslim nung tekülem ki yanglutsü atema Sunni Waqf Board nem ali acre 5 agüjang ta tuyua liasü. Ayodhya nung ali acre 2.77 dak sendakba Ram Janambhoomi-Babri Masjid mangatettep ken o ya 2019 küm August nungi tenzükba angadang aser October 16 nü tatemsa ken o angadangba sülen November ita nung obendang agüja liasü.



Thoothukud, December 30, 2023: Honibarnü Thoothukudi district nung DMK MP, Kanimozhi den tangartemi tawa zümetsüing agi kongshiba kibongtem nem teyari agütsüdang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, DECEMBER (LUCHII) 31, 2023

Kecha matalokba küm !

Tangari sentong renema aliba agitsüba dak alaka Nagaland nung 2023 küm nübertem asoshi tajunga-tamajunga tatalokba tongtibang kecha mali asü. Küm tenzükdang jembitepba apibo tang küm atem dang yabo Nagaland ya tereprangtsü nunga balaka melenshir alitsüsa tatalokba tongtibang aika ataloker alitsü amai bilema liasü. Aji oda, 2023 küm-bo Naga yimten tebilemtsü ya tatem küma telemtetba kati arutsü amai teimla agütsü saka tang küm atem tashi nung Naga yimten temeten ken o ya shirnoki kong kechi kodaka jembidar memeteti atemer. Ano, taküm küm tetenzüklen kanga teimla tulu nung jembiba kaji, tang aliba Nagaland yagi anülü aser anüdok ta Nagaland ana küma lemdangtsü amai center government-i tenangzükbabo agütsü saka ibajia o dang ashi mapa küma atalokbabo tang tashi mangur. Nagaland nung 2023 küm atalokba tulutibaji Election Commission-i sentong yanglutsüba ama assembly election agiba ya liasü. Iba election nung imlaa aliba ama NDPP aser BJP na telongjemi takok ngua government kumtet. Parnoki election mapang nangzükba ama inyaket nungbo tang yabo Nagaland nung mapa tajung tulu aika tenzüker süla. Talisa, tanga yimten teloktemji khen yutsür, center government nung yimsü tesüdak BJP teloki taküm election mapang Nagaland asoshi nangzükbatem rongnung, 'Nagaland Cultural Research Fund' ka sen crore 1000 agi tenzüksü aser Kiphire nung Saramati Cultural University sen crore 500 endoka lapoktsü sentongtem den ano Nagaland Skill Development University ka sen crore 500 endoka tenzüksüba sentongtem dena liasü. Item denji ano Eastern Nagaland Development Board ka tenteta Nagaland anüdoklen purtem asoshi terenlok mapa inyaktsütsü tenangzükba agüja lir. Atangji, election agia government kümer ita tuku dang ajunger asünungji, 2023 küm itemji kecha mataloktetaka tama mekümi taruba 2024 küm nungi tenzüka inyaktsütsü imlar. Nagaland nung alir Naga nungertem dak tajung kaji, tang kecha matalokkaka teimlabo mesamar, anungji ano küm tasen nung Naga yimten tebilemtsü ken o ya, ULFA telok den latet ama, telok ajak den külemisa masüyonga telok ka mesüra ka denbosa latettsü teimla nung iba küm ya tembanger. Atangji, alima nung alir asünungji, 2023 küm Nagaland nung gari lendong tulu aika atalokogo aser item rongnungji Dimapur-Kohima lenmang nung azüklen nungi long tulu mezüa alua gari nung mener ooya alir onsetba aser Kohima-Mokokchung lenmang nung Sumo taxi gari nung tamenertem ajak asütsüsa lendong ajurubatem to kodanga mamatettsü. 2023 küm state government meyong kiojen tasen aika renema semzükogo aser item rongnung balakaji Foothill lenmangbo merenem ser Doyang apu kilo kilonser Amit Shah nem semzükdaksüba mapa to ka asütsü. Atangji, Nagaland nung tatalokba mapatem aika meliaka o bo aika jembioigo aser item o rongnung 2023 küm Nagaland nung kanga bolua jembiba o kaji sen makaba aser sen maliba indang liasü. Iba o ya government nung yimsüsür aser tongti ketdangsertemi nübertem ajurudang kanga bolua jembiba o ka ser südi. Ibaji kodang bilemdangdir, tanga tesüba kümtem nung ama, 2023 küm-a Nagaland nung alirtemi kodaser sen yanglutsü aser aatsü ta masü saka asenok nem shibai sen agütsütsü (?) ta bilemba kolok-ang asenok dak dena lir ta angatettsü. Asen lima nunga senbo lir saka asenoki mangur, kechiyong tenük majungertemi tenük aina enoker dang kaket züngtet ama, sen ya mapa shitak inyak nung dang angur. Ajak dakji alaka, asenok ya benjong penbuba nübertem asünungji yi talubo jema Hornbill benjongbo longsulongua mongogo aser Dimapur nungbo arogo nungertemi yi ayoktsü melaang ta Nagaland angh tashi nem zülur agütsüogo. 2023 küm atalokyonga aruba rongnung sentong nung maliba aser meimlai ka atalokbajibo arogo nungertemi yi ayoktsü akangba ya asütsü.

OLEMSABANG

Hornbill benjong amongba ya khen meyipa reprangshi nung koda ???

- L.Kika Pongener.

(Yashi adok nungi...)

Ano kanga arok-aroka shisadangtsüba kaji, District shia pei pei kin sobaliba benjong (Traditional Festival) den külemi 'Mini Hornbill Festival' amongba yagi, kopi meli-i asen sobaliba benjongtem, kecha tetezü maka kümdaktsütsü aser Hornbill benjong-jiang tongtipangba küma aotsü sudi ta nubur aikati tsüba bilemer. Aji oda, Hornbill benjongji tongtipang mekümdaktsünuba tangatetba nung masü, saka asen Naga nunger kin shia pei pei sobaliba benjong ya mesamai wazüka ayutsüji kanga tongtipanga ta angatetdaktsünur. Tatishitsü...Aor Moatsü & Tsüngrem-mong benjong mapang Mokokchung nung Mini Hornbill benjong külemi amonger, Sema nunger Tuluni benjong mapang Zünheboto nung Mini Hornbill benjong külemi amonger, Lotha nunger Tokhu-Emong benjong mapang Wokha nung Mini Hornbill benjong külemi amonger etc. Yamaji Naga nunger kin shia pei kin sobaliba benjong den Mini Hornbill benjong külemi amongba jagi, tanem-tanemi pei kin sobaliba benjongji sama-a aotsü ana nung lir. Aji oda, lia-liabo Moatsü aser Tsüngrem-mong benjong nungja-jia dena sama-a aotsü ana nung lir. Anungji, District shia Mini Hornbill benjong amongba inyakyim ya, sorkar-i khen meyipa reprangshitsülaa...ta nuburtemi bilemer.

Anungji takoktsü lenmang dang lira, küm shia December ita 1-10 tashi Hornbill benjong amongba anogo küsa nungji, Kohima jila 'Kisama' nung dang masü, saka Naga lima District Head Quarter ajak nung "Hornbill Festival"-ji liromedema amongtsüla. Aser pei pei kin sobaliba benjong yabo 'Hornbill' benjong denji memeyokteptepi balaka amongtsüla. Iba amaji melenshia inyaktet asübo kanga tajungba sula, kechiyong kodang yamaji District Ter-ase (13) prongla nungji külemi liromedema mongdir, bendanger 'Tourists' arurtem ajaki Naga lima topur ajungba ajak repranga jajatsü maongka tajung asütsü. Ano bendang lima nungi Tourists arur ajak jagi Naga nunger kin shia sobaliba balalaji tali tejangjaba metettsü maongka tajung asütsü. Ano aji dang masü, District ajak nung küsa anogo nung Hornbill benjong amongba jagi asen Naga nunger senotsü tajangzük (Revenue) tang ngua aliba tang nungi kanga talila aika ajangzüktsü maongka tajung asütsü. Ano asenoki kanga junga angatettsübaji, küm shia Kohima jila Kisama yimtsüng nung Hornbill benjong amongtsü atema Naga nunger kin shia pei pei District nungi nubu teshimtet aika yar-tsüngsang aser shilem balala agitsü atema oli-aruli asüdang, 'Transportation' nung senotsü aika endoker, aser ibajagi kin shia aser District shia rongsenkettsüng nung kanga telungi alur. Ashiko, anutoklen aliba kintemi 2023 küm Hornbill benjong nung shlem magitsü ta asüba-to, iba amala küli kar agi asütsüa akok. Anungji kokrabangla, Hornbill benjong amongba inyakyim ya sorkar-i khen kanga junga asadanga reprangshir, tang inyaka aliba inyakyim ya tera tajungba inyakyim ka agi melenshi nungbo, kanga agi tajungba asütsü ta nuburtem tangatetba olen ka lemsateper. Aji oda, Naga nunger yimsusur-i nubur taginuba angateta teküratiba nung meyipa reprangshitsü aser mapa küma inyaktsü yimlar.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

JSM-i tribal Khristantem ST list nungi agientsü akhanger



December 24, 2023 nü Jharkhand yimtiba, Ranhi nung Janjati Suraksha Manch (JSM)-i ayongzükba senong nung longkak aitertermi shilem agiba noksa nung angur.

December 30, 2023: RSS den sendaktepa aliba Janjati Suraksha Manch (JSM) teloki Khristmas mongpu nung Khristan tribal tem anema campaign ka agia Jharkhand aser Tripura na nung tribal Khristanten Scheduled Tribes list nungi agientsü takhangba agütsü.

December 24 nü Jharkhand nung aser December 26 nü Tripura nung JSM-i tribal Khristantem ST nungi agientsü takhangba agüja longkak ait.

State anaprongla nung tribal Khristan nütsüng aika lir.

JSM-i state kar nung dang masü saka linük tesem ajak nung tribal Khristantem ST list nungi agiendaktsütsü atema akhangtsü tebilemba lir.

Khristmas anogo atongtsü anogo ka dang lia JSM-i Jharkhand yimtiba, Ranchi nung aliba Morabadi Ground nung ayongzükba sentong nungji nisung 50,000 jungnüa aden. Parnoki tribal Khristan mesüra Muslim yimsü dangi meyipertem ST nungi agientsü takhangba agütsü.

"Ugulan de-Listing maha rally," ta ajaba sentong nungji shilem agirtemi sobaliba sübotsü süboba den lasang, nok aser hadir balala amer longkak aita liasü.

Iba rally nungji Hindu right-wing lenirtem aika densema liasü. Parnok rongnung Padma Vibhushan award angur aser taoba mapang Union Minister Kariya Munda, BJP Lok Sabha MP

Sudarshan Bhagat aser Rajya Sabha MP Samir Oraon nung den JSM national convener aser taoba mapang Chhattisgarh nung minister Ganesh Ram Bhagat nungera liasü.

December 26 nü Tripura nunga JSM-i Agartala nung aliba Astabal Ground nung kasa sentong ayongzükba tribal Khristantem ST list nungi agientsü atema takhangba agütsü.

Tripura nung nütsüng shilem 33 shi Scheduled Tribes nütsüng lir aser state nung tribal nisungtem dang Tipra mesüra Tiprasa ta ajar.

JSM-isa sangküm February ita nung Delhi nunga kasa sentong ayongzükba agitsü tebilemba lir.

2024 küm Khristantem reshikangshi ano tamajungba akümtsü: RI

December 30, 2023: 2024 küm linük aika nung Khristantem reshikangshi ano tamajungba dang akümtsü, ta Release International-i metetdaktsü.

Release International-i tan hopta Persecution Trends report sayaa liasü aser iba report ajanga sangküm Nigeria, India, Pakistan aser China densema ano linük aika nung Khristantem reshikangshiba jenjang tamajungba akümtsü, ta metetdaktsü.

December 23 nungi December 25 tashi nung Nigeria kubok Plateau State nung kiralongrartemi Khristan 200 jungnüa tepseta liasü, aser asürtem rongnung pastor tem aser Arogo züngsemtem densema lir; iba dak alia Khristantem meyong ki aika raksatsüogo.

Release International-i, "Item tatalokba atema onok kanga jashir aser Khristmas mapang Khristan jenti tepsetbaji onoki sashia aitsür," ta metetdaktsü.

Persecution Trends report ajangasa, 2024 küm Nigeria nung Khristantem anema inyakba ano tali bulua akümtsü, ta metetdaktsü.

Nigeria tesem balala nung Islamic kiralongrartemi Khristantem amaker aser ali rakzükba agir, ibayongji Khristantem aikati pei ki toktsür jenshir.

Release International CEO, Paul Robinson-i alima nung Arogotem dang Nigeria nung Khristantem atema sarasademjang, ta ayongzükogo.

India nunga anti-conversion ozüngtem ajanga Khristantem kanga timtemer. Manipur nung rara adokba ajanga tang tashi Khristantem timtemer. Taküm Manipur nung nisung 175 shi tepsetogo aser meyirjang aikati pei ki toktsür ajenba den Tenla ki noklang aika rongdoktsüogo. Manipur nung Khristantem aika tekülem sentong agitsü atema Tenla ki makai kümogo.

Sangküm April aser

May ita tsüngda India nung Lok Sabha election agitsü aser Hindu-nationalist BJP-i maneni takok ngura reshikangshi maneni alitsü, ta Release International-i metetdaktsü.

Release International partners-i, "Khristantem aser tanga minorities reshikangshi ita shia teimba-teimba dang akümer," ta metetdaktsü.

China nung maneni yimsü dak sendakba tenok dangba tem benoktsü aser linük Tir, Xi Jinping-i Arogotem nung Communist Party tangatetbatem benoktsü atema maneni inyaktsü; nükjidongji China nung Khristan yimsü meshimeshia samatsütsü atema lir, ta Release International partners-i metetdaktsü.

Robinson-i, "India aser tanga linüktem nung Khristantem anema inyakba kanga bulua kümdar. Khristantem amaker aser kidang nungi aridoker," ta metetdaktsü.

ANO GO ABEN TSÜNGREM DEN

TSÜNGREM DANGI BENANG

Ni ne den Ijipi aotsü, aser ni ne semchirtem tanaben iba limaisa meyipa anir arutsü, aser Yosef teka manung ne arishi tembangtsü.

~ Lipok 46:4

Nisung ka taküm alima nung alitsü kanga tasak, tarutsü mapang kechi tensa tia ang bener arutsüar memetet asü nung shisabulur aser tsübua bilemer. Kenünübo wadang balala asoshi kanga ratamata bilemtsü sa tensa ajurur. Alima nung dang alir asü nung rongsen, tesendaktep, temang hasü anema aliba, lokti aser kibong mapa asoshi shisabulur. Chirnurtem, teintet rogo tantsur tamburtem, shilu manem, matamabensartem, kiojen koda asütsü ta bilemtsü sa tia ajurur.

Saka khen bilemdangdi! Na shisabulua dang aliba taküm asü? Tila teri aser mapang ajak nung shisabulua alidang Tsüngrem temoatsütem züngdangtsü amadoker asü? Yamaji süra Tsüngrem tsüngdangi ne khuret ajak bener odangang, ne khuret tem pungpapunga akümtsü. Yakobi pa khuret Tsüngrem dangi aben aser telangzüba tajung angu, iba telangzüba tajung angudang Yakob koda anisüngzüker alitsü! Tasü mapang tonga koda len anitsü Tsüngremi Yakob dangbo sayuadok. Nenok shisa buluba ajak pa dak yuang kechiaser pai nenok asoshi anepalur. 1 Peter 5:7

SARASADEM:

Temeim Tsüngrem, ni shisabulur ka masü Ne den teti jembitsü khuret masi saka temoatsü züngdang ka kümdakjang. Amen.

Tawa Mauritania linük nung apuba Khristantem ajak chiokogo

December 30, 2023: Khristantembo yimjak nung November ita nung Mauritania linük nung Khristantem baptiba sentong agiba video ka prokshiba sülen Khristan aika pua liasü, ajisüaka ketdangsertemi parnok ajak chiokogo.

Baptiba sentong agibaji ajanga Muslim nungertem temelung yirutsüogo, ta aija Khristantem pua liasü.

Khristan lenir kati, "Parnok kidangi aotsü mela, ajisüaka parnok dang mimshia dang tekülem agitsü tuyuogo. Asen adianutemi Islamic züngsemtem dang nungibo sorkar tetsübuba ama onoki reprangteter. Ajak junga tembangba atema Tsüngrem dang pelar," ta metetdaktsü.

November ita nung baptiba video ji prokshiba sülen Khristan 18 shi pua liasü, ajisüaka December 18 tashi nung parnok ajak chiokogo.

Northwest Africa nung aliba linük nung sayutsüngiba anema ozüng mali, ajisüaka ketdangsertemi Islam yimsü dak alaka tanga yimsübo yimjak nung proktsü atema memelar.

November 30 tashi nung Selibaby nung Khristan asem pua liasü. Baptiba sentong agiba video ka social media nung prokshiba sülen Muslim nungertemi Khristantem tepsettsüla, ta longkak aita liasü, iba sülen Khristantem aika apu.

Mauritania nung bendanger Khristantem dak alaka senso

Khristantembo yimjak nung tekülem sentong agitsü memelar, ta U.S. State Department indang International Religious Freedom Report ajanga metetdaktsü.

Mauritania linük nung Islam yimsü toktsür tanga yimsü agizüktsü memelar, mesüra tasüba temerenshi agütsütsü akok. Iba linük nung nütsüng shilem 98 Sunni Muslim nungertem lir aser nütsüng shilem 1 Shiite Muslim nungertem lir. Nütsüng million 4.9 aliba linük nung Khristan nütsüngbo 11,000 shi dang lir aser ibaji nütsüng shilem 0.2 dang lir.

Mauritania linükia International Covenant on Civil and Political Rights (ICCPR) nung sign süa lir, aser iba tezüngzüktep kubok pei melungba yimsü beshitsü mesüra tanga yimsü agizüktsü atema senso ajak nem temeden agüja lir, ajisüaka ketdangsertemi Islam yimsü dak alaka yimjak nung pei yimsü proktsü memelar, ta religious freedom report ajanga metetdaktsü.

"Temelaba agüja aliba Arogotemi Tenla kidang dang tekülem sentong agitsü akok ajisüaka tanga yimsü amanger ka yimsü meyipdaktsütsü memelar," ta kasa report ajanga metetdaktsü.

Tang alima nung Khristantem alitsü linük tamajungtiba 50 rongnung Mauritania ya jenjang 20 buba nung lir (Open Doors 2023 World Watch List).

**AO OSHI ANGAZÜKDAK:
TANÜ ANGAZÜKTSÜBA OJANG**



Tir Yimyim

Shimen

(n) ali telung nung aliba shi tapu ka (a kind of tuber)

* Ayawara mapang shimen shi bushia atur.

Shimo

(n) shi temo (fat, lard)

* Shimo nung amtsük roa achir.

OLONG PAITEP # 6655

1		2		3		4		5
			6		7			
8								
					9			
		10						
11								12
				13		14		
15								
16						17		

TIPIEN

- 1. Nüji masü - (4)
- 3. Technütsüka - (6)
- 7. Aketa shirangba - (5)
- 8. Pi - (6)
- 9. Amëna - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

LANGTSÜNGLEN

- 1. Jila tulu - (5)
- 2. Sarasademang tembang - (4)
- 4. Tarutsü indang ashitem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

OLONG PAITEP # 6654 TELANGZÜBA

TIPIEN :

- 1. Tesangra, 5. Mungo,
- 7. Kisen, 8. Salem, 12. Semki,
- 14. Kilem, 15. Kensü,
- 16. Sangpang.

LANGTSÜNGLEN :

- 1. Temesen, 2. Raksa,
- 3. Aon, 4. Aso, 6. Nile,
- 9. Alizüng, 10. Omen,
- 11. Lemta, 13. Ola, 14. Kin.

NAI-A YA METETTER MA



Hombarnü New Year anogo nung Indian Space Research Organisation (ISRO)-i 'PSLV Orbital Experimental Module' POEM kaketa yoktsü aser iba ajanga "Wealth From Waste" adoktsü. Iba ya ISRO indang Polar Satellite Launch Vehicle lir aser XPoSAT (X-ray Polarimeter Satellite) bener anünglaki atutsü aser experiments 10 agitsü. Iba Polar Satellite Launch Vehicle ya Thiruvananthapuram nung yangluba 'Women Engineered Satellite' (WESAT) lir.

Narendra Modi-i PM akümba sülen telungpur 8200 temai adokogo



Guwahati, December 30, 2023 (Agencies): Prime Minister Narendra Modi nem tenüngsang agütsür December 29 nü sorkar aser ta Assam Chief Minister ULFA pro talks faction Himanta Biswa Sarma-i ashi. tsüngda yimjung 2014 nung Narendra Modi tenangzüktep agiba atema Prime Minister akümba sülen

Assam nung telungpur 8200 temai adokogo ta CM Sarma-i ashi.

Iba tenangzüktep sign asüdüng Union Home Minister Amit Shah dena liasü aser iba ajanga Prime Minister Modi-i Assam aser kidanger state tem nung yimjung, azükaru aser terenlok bener arutsü mangdang indang kuli agütsür ta pai metetdaksü.

Prime Minister Modi lenisüba kübok Ministry of Home Affairs-i tesüba küm pungu tsüngda Northeast nung yimjung aser arrtsü dak sendakba tenangzüktep 9 tashi nung sign sütepogo.

Imphal West nung VVF aser taoba journalist ka khaset

Imphal, December 30, 2023 (Agencies): Imphal West district nung Kadangbandh yimtsüng anasa arishi küm 27 tain Village Volunteer Force (VVF) aser taoba journalist ka khaset.

Honibarnep 3:30 ako meta Mahadeva hill foot nung telungpurtemi pa dak injang khaloktsü. Pa ya Kadangbandh yimtsüng temeket 5 Gram Panchayats ajanga tentetba VVF volunteers rongnung ka liasü.

James tepsetba anema Joint Action Committee ka tentetogo aser parnoki JNIMS nungi pa indang tasümgang magizüktsü metetdaksüogo. Sorkari inter districts nung telungpurtemi amakba atema mapa meinyak tashi James tasümgang magizüktsü ta JAC-i metetdaksüogo.

Mahadeva hill foot anasa telungpurtemi N James dak injang khaloktsü aser pa Jawaharlal Nehru Institute of Medical Sciences-i anir aodang len tom nung asü.

Kangpokpi district nung Kuki nunger teimba lir. N James ya taoba mapang Naharolgi Thoudang osangkaket nung osangbener ka liasü.

Manipur nung kin o kin tsüngda rara nung nisung 200 shi taküm samaogo.

Manipur CM Biren-i sensotem atema schemes aika tenzüksü

Imphal, December 30, 2023 (Agencies): Chief Minister Nongthombam Biren Singh-i Manipur state nung telok balala yaritsü atema welfare schemes aika tenzüksüogo.

Minister's Sportspersons Livelihood Support Scheme, School Fagathansi Mission 2.0 aser College Fagathansi Mission tenzüksü.

saka iba tatalokba khukhua aitsütsüla. Asenok ajak olemteptsüla aser onüktem angatetteptsüla" ta CM Biren-isa metetdaksü.

Pai tenzüksüba scheme rongnung Chief Minister's Ima Nongthangleima Yaipha Tengbang Scheme dena lir. Iba ya arishi küm 40 tema tetsürtem nem teyari agütsütsü atema lir.

Imphal West district nung village volunteer ka amakba aitsür aser telok kari state nung tensa raksatsütsü meranger ta Biren-i ashi.

Chief Minister Nongthombam Biren Singh-i health coverage, housing, financial support for women aser regional stability atema maparen balala inyaka arur.

CM Biren-isa Farmer Livelihood Support Scheme, Chief Minister's Khungang Ama Sababung Ama, Chief

"Iba ken o bushisüngdang südar aser combing operation inyakdar. Manipur nung civil societies, Meira Paibis aser teloktemi tensa süngjemdaksütsü meranger

CMHT scheme ajanga kibong shia nem kümshia Rs. 5 lakh health coverage agütsür aser iba ajanga sorkari Manipur nung alirtem yariba kuli agütsür.

February nung Assam assembly budget session agitsü

Guwahati, December 30, 2023 (Agencies): Assam assembly indang budget session taruba February ita agitsü ta Assam assembly deputy speaker Numal Momin-i ashi.

Taruba Assam budget session nung tongtipang bill aika benoktsü ta Momin-i ashi. "Onoki February ita tetenzüklen nungi Assam legislative assembly indang

budget session tenzüksü" ta paisa ashi. Assam nung budget session atema maparen tenzüksü aser sorkari Anti-Polygamy Bill benoktsü akok ta Speaker Momin-isa ashi.



Honibarnü National Liberation Front of Tripura (NLFT) züngsem ana Border Security Force (BSF) tsüngdang temai adokba sülen agiba noksa angur. Tanep Prahar Jay Tripura aser Debajay Tripura nati ozüng alema inyaksangshiba toktsütsü mulungteta temai adok. Tenaprong ya Dhalai district kübok Thalchera, Chawmanu nungi lir aser yaküm October ita NLFT (BM) nung aden. (Agartala, December 30)

Biden administration-i Congress mekener telemtetba agi



Joe Biden

Washington, Luchii/ December 30 (Agencies): United States tir Joe Biden indang administration-i Israel dang jongdak prangbong injang aser hadir balala ayoktsü atema Congress mekener telemtetba agiogo. Gaza Strip amakba anentsü asoshi alima kintemi akhangba mapang ka nung tang iba telemtetba agiogo.

US Secretary of State Antony Blinken-i Congress dang pai ita ana tsüingda tanabenbuba jongdak nüngdak atema telemtetba agiba metetdaksüogo, koba Israel dang prangbong injang aser hadir balala USD million 147 agi ayongba dak sendaka lir, ta State Department-i metetdaksü.

"Israel atema jongdak tenüngdakba apir secretary-i Congress dang pai pa nem agüja aliba tashi amshiba metetdaksüogo.

"Israel kümzüka toktsütsü atema United States bendanga agütsür lir aser Israel-i amokmeren balala nokdangtsü asoshi jenjang balala agitsübaji US tejangraba lir," ta kasa sangdong ajanga metetdaksü.

Hadirtem rongnung fuses, charges aser primer densema lir, koba 155mm shell yanglutsü atema Israel-i taoba mapanga aliogo.

Hokolbarnü telemtetba agiba ya aibenbo majangshir, ajisüaka tanga mapanga iba amala

Gaza nung Palestine nung 21,507 tepsetogo: Health Ministry

Gaza City, Luchii/December 30 (Agencies): October 7 nungi tenzüka Israel-i Gaza amakdang Palestine nung 21,507 tepsetogo aser nisung 55,915 yirua lir, ta Gaza indang Health Ministry ajanga ashir.

Tesüiba ghonda 24 tsüingta Israel nungeri amakdang Palestine nung nisung 187 tepset, ta ministry ajanga ashir.

Maneni occupied Jerusalem nung aliba Wadi al-Joz tesem nung tensa mejungi akum, kong Palestine nung Hokulbarnü sarasadem aortem dak Israel sepaitemi "skunk water" aser tear gas khaloktsü, ta Wafa news agency ajanga ashir.

Israel sepaitemi tekülemertem pua merenshi, shirnok Al-Aqsa Mosque-i aitsü

mesükba telemtetba ya pezüben tashi agiogo aser iba tetezü bendangertem dang military oset balala ayoktsü atema Congress nung mapang talanglang sensaksemtsü aliba nungi jenbotsü.

Washington, DC nungi Al Jazeera osangbener Patty Culhane-i ashiba agi, osang agütsüba ya tali tajungba angatetsü nüngdaker.

"Biden administration ketdangtsür tongtibangtemi joko hopta aika Israel-i takok tashi azüzüka inyaksüla ta ashiba onoki angashia arudar. Iba tetezü bomb pokloktsüba anentsüla aser civilian tem aika asüba anendaksütsüla," ta lai ashi.

"Anungji iba dak sendakba nung parnoki rara tajemba kümduksüner saka tang Israel dang maneni raratsü asoshi prangbong injang aser hadirtem ayoker," ta laisa shisem.

Culhane-isa, Israel-i 155mm M107 projectiles alitsü aser iba artillery shell yagi Gaza amala nütsünyongsük aika aliba tesem nung teraksatsüba tulu adokdaksütsü, ta ashi.

"Parnoki \$147.5m package nung shell kwi alitsüar ajibo osang tejangja magütsü. Ajisüaka taoba mapang agütsüba package tem asadanga Israel dangi bomb meyirejangsa meyirejang yoktsü," ta Culhane-i ashi.

December 9 nüa Biden

memela aser iba yongji parnok Old City of Jerusalem anasa Wadi al-Joz nung sarasadema liasü.

Israel sepaitemi tekülemertem dak ngisa agi meya aliba injang khaloktsü ta ashir.

Tekülemer nisung 12,000 dang Al-Aqsa Mosque telungi sarasademtsü ai. Akhi mapang Hokulbarnü sarasadem asoshi Al-Aqsa Mosque yagi nisung 70,000 tashi aier.

Al-Aqsa Mosque telungi aitsü nokdangba aser Old City nung alirtem dak Israel sepaitemi Hokulbar 12 tashi atonga tashiyim amshia arur.

Rara tenzüker UNRWA shelters nung jenoka aliba nisung 308 tepsetogo aser nisung 1,095 yirua lir, ta UN agency for

administration-i, Israel dang USD million 106 alang tank nung amshiba injang 14,000 shi ayoktsü atema jongdak telemtetba ka agia liasü.

Biden-i, Ukraine, Israel aser national security dak sendakba nung nüngdaka alirtem nem teyari agütsütsü atema USD billion 106 agizüktsü asoshi mepeshiba Congress nung magizük tsüingda tang iba jenjang ya agiogo. US immigration aser border security policies dak sendakba nung sensaksema aliba ajanga iba onük ya sensak mesemi arudar.

Gaza nung nisung aika asür ajisüaka US-i Israel dang maneni prangbong injang ayokba atema aitsüba dak sendakba nung Biden administration-i, civilian tem asüba tajemba kümduksütsü kodang tongtibang iba indang parnoki Israel den maneni sensaksemdar, ta ashi.

Ajisüaka Qatar University nung Gulf politics indang associate professor Luciana Zaccara-i Al Jazeera dang ashiba agi, rara dak sendakba nung parnok inyakyim ya khenyongi balaka.

"Parnoki civilian tem asüba dak sedakba nung US-i kanga süoki ia agir ta nüburttem nem angatetdaksütsü meranger aser kasü ka nung parnoki Israel (military) nem maneni teyari agütsür. Anungji iba ya khenyongi meputep.. Iba ya kodaser linük tejangraba ka aji angatetsü tasak," ta pai ashi.

Gaza nung civilian tem asüba anema Democrats tem densema nüburttemi tenongshiba tali akümba mapang iba policy ya tejangja ka masü, ta Zaccara-i ashi.

Democrats tem karibo, Ato Kilonser Benjamin Netanyahu-i aniba sorkari Gaza nung civilian tem tepsetba azüoktsü ta tenangzüka tejangja ka agütsü nungang Israel nem teyari agütsütsüla ta shiogo.

Palestinian refugees ajanga sangdong ka nung ashi.

"December 25 nü UNRWA Maghazi Prep School nung jenoka alir nisung ana tepset aser ka yiru," ta ashi.

"Gaza nung kecha nunga kumzüka mali."

Gaza tiyonglen nungi Palestine nung nisung 150,000 shi jena ogo, kong Israel sepaitemi refugee camp tem meita aor aser amaker, ta UN-i ashi.

Anüdoklen Bureij camp tonga tank tem aruogo, ta tenük kuli alir aser Hamas indang armed wing ajanga ashir.

Tawa Israel mitkar temi Bureij aser anasa Nuseirat aser Maghazi camp tem nung tenük yoker alilen nungi makyonga aor.

MOLUNGNEN O

"Kechiasür pai ayako tendaktsür, aser paisa aneptsür; Pai yirutsür aser pa teka agisa aneptsür." Yob 5:18



OCHENBA

1st October 1981- 25th December 2023

Ozü kibong tendangba mapang ka nung nenoki sarasadem aser lenla balala nung nongita yariba ajanga onok kanga anisüngzüko aser iba atema pelar. Tulusang Tsüngremi nenok ajak molamoshia moajang ta ozü sarasadem.

Item kija aser lokitem dang mejeta pelaba lemsateper:

- * Ao Senso Telongjem Bengaluru
- * Ao Kaketshir Telongjem Bengaluru
- * Ao Baptist Fellowship Bengaluru
- * Naga Students' Union Bengaluru
- * NCF Bengaluru
- * St John's Medical College Hospital (SJMCH), Bengaluru
- * Sr Medosenu Jacinta Thakro (SJMCH)
- * Mahendra Kumar, Stoma Care Specialist
- * Mr & Mrs Lima Aier & Family, Bengaluru
- * Pastor Reihe, Poumai Baptist Church Bengaluru
- * Mr & Mrs Faroque Ahmed (Manju), Bengaluru
- * Blood Donors
- * Mrs Alemla Imsong, Chaplain, Baptist Hospital, Bengaluru
- * Friends & Wellwishers, Bengaluru
- * Tata Consultancy Services (TCS)
- * NCF Kolkata
- * Christian Higher Secondary School 2000 Batch (Class 12)
- * Dimapur Ao Baptist Arogo
- * Changdang Baptist Arogo
- * Dimapur Changdang Telongjem
- * Dimapur Changdang Kaketshir Telongjem
- * Dimapur Changdang Tamang Telongjem
- * I Zunga
- * Counsellors & various Prayer Groups
- * Signal Colony, Dimapur
- * Individuals, friends & wellwishers.

- Temeim tsürapur, adianu aser kinungertem.

Argentina-i parnok BRICS bloc nung madentsü ta sangdongogo

Buenos Aires, Luchii/ December 30 (Agencies): Argentina-i parnok BRICS bloc nung madentsü ta metetdaksüogo aser iba ajanga tawa shimba far-right tir Javier Milei-i election atema nüboyimba mapang nangzüka ataloktsüogo, shibai anüolen aliba linüktem den tesendaktep tajungba küma yanglushitsü tenangzüka agütsüogo.

December 22 nü yokba shiti koba Hokulbarnü sangdonga liasü iba shiti nung Milei-i, Brazil, Russia, India, China aser South Africa nungi lenirtem dang Argentina iba bloc nung adentsü atema tang mapang shitak masü ta shiogo.

Milei-isa, pa indang foreign policy ya taoba sorkar dang nungi lenla aika nung balaka lir ta shiogo. Iba dak sendakba nung taoba administration-i telemtetba agir aliba kar lepa reprangshitsü.

Argentina tir tasenba yagi, pai anüolen aliba linüktem den liromedema foreign policy ka benoktsü ta shiogo, koba taoba sorkari tanga renloka aliba linüktem den tesendaktep yanglutsü merangba dang nungi balaka asütsü.

Taoba centre-left tir Alberto

Fernandez-i, iba bloc den rongsenketzung nung tesendaktep akangshitsü atema BRICS nung Argentina adentsü atema inyaka aruogo. BRICS züngsemtem yagi alima GDP shilem 25 ayimjemer. Argentina BRICS nung 2024 küm January 1 nü adentsü liasü.

Buenos Aires nungi Al Jazeera correspondent Monica Yanakiew-i ashiba agi, Milei-i office mapa agizüker hopta asem tsüingda temelenshi aika asoshi tetuyuba agütsüogo.

Nüboyimba mapang China amala communist lima aser kidanger Brazil amala linüktem anema pai nokdaka liasü aser pa indang economic aser foreign policy nung Israel aser US amala anüolen aliba linüktem den tesendaktep yanglutsü atema inyaksü ta ashi.

Ajisüaka BRICS lenirtem dangi yokba shiti nung Milei-i ashiba agi, iba telok den medenaka tesendaktep akangshitsü asoshi maneni inyaksü.

Ajisüaka BRICS lenirtem dangi yokba shiti nung Milei-i ashiba agi, iba telok den medenaka tesendaktep akangshitsü asoshi maneni inyaksü.

Bajrang-i Paris Olympics atema renemshi tenzüksü mepeshi



Bajrang Punia

Luchii/December 30, 2023 (Agencies): Olympic medallist Bajrang Punia-i Honibarnü Sports Ministry dang, taruba kum Paris Olympics asayatsü ita tenet dang anunga lia linük nung wrestling inyakyim tenzüksü asoshi mepeshia asungdangogo aser ashiba agi, iba asayamung atema shingaia süoki ia magir ama bilemer.

Wrestler temi taoba WFI tir Brij Bhushan Sharan Singh anema longkak ait tenzükba

sülen linük nung Wrestling asaya dak sendakba nung inyakyimtem anena lir.

Wrestling Federation of India (WFI) committee tasenba election agiba sülena iba mepetmesü ya mebantetet, kechiyong Sports Ministry-i, Sanjay Singh-i aniba telok ya suspend sütsüogo. U-15 aser U-20 national Championships sangdongba dak sendakba nung WFI temzüng ozüng alema inyaksangshiba atema team

tasenba ya suspend süja liasü. "Wrestling dak sendakba nung inyakyim ajak ita aika bangdaka lir. Asayartem renemshitsü (Paris Olympics atema) asoshi nationals mesüra camp kecha ayongzüka agia mali," ta Punia-i X sabang nung zülutsü.

Punia shibai, Brij Bhushan den kanga junga sendaka alisang Sanjay Singh shimba anemba temaitsü pa indang Padma Shri meyipa agütsütsü telemtetba agia liasü, paisa Olympics atema renemshitsü kanga tongtibang kumogo, ta ashi.

"Ita tenet sülen Olympic Games asayatsü lir, ajisüaka shingaia süoki ia magir ama bilemer. Taoba Olympics pezü nung wrestler temi medal pezü tashi nguogo," ta pai ashi.

Tokyo Olympics nung Punia-i 65kg freestyle nung bronze medal nguogo aser pai ashiba agi, ketdangsurtemi asayartem tarutsü indang temulungdang ayutsü nungdaker.

"Anungji ni Sports Ministry dang wrestling dak sendakba nung inyakyimtem ajak takaratiba nung tenzüksü mepeshir, ajita asünungdang asayartem kumzükettsü," ta pai shisem.

Hasaranga Sri Lanka T20 team captain kumogo

Luchii/December 30, 2023 (Agencies): Sri Lanka CB-i Honibarnü sangdong ka ajanga Twenty20 team captain mapa abentsü atema all-rounder Wanindu Hasaranga shimba sangdongogo. SL team taruba ita Zimbabwe den asayamung ka asayatsü lir.

Kasa mapang nung one-day international team batsman Kusal Mendis lenisüba nung asayatsü.

Sri Lanka Cricket (SLC)-isa, Hasaranga aser Mendis na indang vice captain asütsü asoshi Charith Asalanka shimba metetdaksüogo.

August ita Lanka Premier League asayaba mapang yiruba ajanga Asia Cup aser 50-overs World Cup nung masayatetba sülen Hasaranga temang tajungba kumogo aser pa asayatsü renema lir.

Pai captain mapa ya Dasun Shanaka ket nungi agizükogo, shiba Zimbabwe den ODI asem aser T20 asem asayatsü aliba atema preliminary squads nung züngoksema lir. Iba asayamung ya Sri Lanka nung January 6 nungi tenzükba asayatsü.

Shanaka tebi yiruba ajanga World Cup nung asaya ana dang



Hasaranga

asayar masayatetsüsa akümba sülen Mendis-i ODI team captain mapa agizükba liasü.

Takum World Cup nung Sri Lanka team-i kanga junga masayatet aser parnok team 10 asayaba asayamung nung asaya ana dang akokba sülen tekububa nung tembanga liasü.

Iba sülen SLC-i, taoba opener Upul Tharanga lenisüba nung selection committee tasen ka shim, kong taoba mapang asayar Ajantha Mendis-a densema liasü.

SLC-isa, taoba captain aser nungtugu batsmen Sanath Jayasuriya, kum ka atema 'cricket consultant' asütsü shimogo.

India vs South Africa: 2buba Test atema Avesh Khan shimogo

Luchii/December 30, 2023 (Agencies): South Africa den taruba hopta nungi tenzükba asayatsü aliba tanabuba Test asaya atema Avesh Khan shimogo. Super Sport Park, Centurion nung mezüngbuba Test asayaba mapang India nunger bowler temi kecha mesütet.

Tang India A aser South Africa A na asaya aliba asaya mezüngbuba innings nung Avesh-i wicket pongu agia Benoni nung SA team nem run 263 dang yangludaktsüba nung tongtibang shilem agia liasü. Pai wicket agiba dang masü saka over 23.3 aonba nungi pongubo maiden liasü.

Mezüngbuba Test nung Jasprit Bumrah aser Mohammed Siraj natibo junga asayaogo, ajisüaka Prasad Krishna aser Shardul Thakur nati ball junga monteti SA team-i run yangluba menokdangtet.



Avesh Khan

Mezüngbuba innings nung India team-i run 245 dang yanglutet aser kasa mapang nung bowler temi run 408 agüja liasü aser tatem nung SA team-i innings ka aser run 32 agi asaya koka liasü.

"Iba ya run 400 junga yanglutsüba wicket ka masü; onoki run aika agütsü. Onoki ball ajaklen onshia liasü, saka ibalajia ataloker. Bowler ka (Bumrah)

dak dangbo metaloker masayatetsü, tanungba pacer asemia parnok shilem agitsüla; South Africa team-i ball koma aon iba nungi angazükettsü," ta asaya tembangba sülen India captain Rohit Sharma-i ashi.

"Team nungi bowler temi aika taoba mapang iba tesem nung asaya mali, anungji ni parnok maitsüner," ta Rohit-isa shisem.

First-class cricket asaya 38 nung Avesh-i wicket 149 agir lir aser pa indang average 22.65 lir.

Tanabuba Test atema

India team:

Rohit Sharma (C), Shubman Gill, Yashasvi Jaiswal, Virat Kohli, Shreyas Iyer, KL Rahul (wk), Ravichandran Ashwin, Ravindra Jadeja, Shardul Thakur, Mohd. Siraj, Mukesh Kumar, Jasprit Bumrah (VC), Prasad Krishna, KS Bharat (wk), Abhimanyu Easwaran, Avesh Khan.

AFC Asian Cup atema India team sangdongogo

Luchii/December 30, 2023 (Agencies): India tebur team head coach Igor Stimac-i Honibarnü AFC Asian Cup Qatar 2023 atema asaya 26 tenüng sangdongogo.

India team tang agi pongubenbuba Asia Cup nung asayatsü lir aser asayartem Honibarnü Doha tongogo. India team Group B nung mezüngbuba asaya January 13 nü Australia den Ahmad bin Ali Stadium, Al Rayyan nung asayatsü aser iba sülen kasa tesem nung January 18 nü Uzbekistan den asayatsü. Maneni Stimac-i aniba team ya Al Bayt Stadium, Al Khor nung January 23 nü Syria den asayatsü.

"Asayartem ajak football asayaba yimya dak sendakba nung kasashi dang lir. Onok team ka aser kibong ka lir. Ajisüaka sempet koda jungdir jungaka yimayimpong mejungra kecha majangzükettsü," ta Stimac-i ashi.

Asayamung masaya tsünga team nung temelenshinüba kar indang jembiba mapang Stimac-i, "Onok defensive compactness, offensive transitions, aser set pieces tem atema inyaksü bilemdar. Box telung nung nisung anüksü asoshi inyaksü kanga tongtibang, kechiyong

iba asaya yimya agi ni mepelar. Taoba asaya ishika nung onok nungdak makaba nung box telung nung goal kar chiogo," ta ashi.

"Onok den asayatsü aliba team asemprongla technically kanga tajung, onok dang nungi tashi taitba aser takaraba lir. Anungji asaya asemprongla balala asayatsüsa akümtsü, koba ni nenok dang mashitsü. Tang asayartem fitness jenjang reprangshimtsü aser taruba hopta ana tsünga kechisa inyaktetsü aji asateptsü," ta pai shisem.

AFC Asian Cup Qatar 2023 atema India team:

Goalkeepers: Amrinder Singh, Gurpreet Singh Sandhu, Vishal Kaith.

Defenders: Akash Mishra, Lalchungnunga, Mehtab Singh, Nikhil Poojary, Pritam Kotal, Rahul Bheke, Sandesh Jhingan, Subhasish Bose.

Midfielders: Anirudh Thapa, Brandon Fernandes, Deepak Tangri, Lalengmawia Ralte, Liston Colaco, Naorem Mahesh Singh, Sahal Abdul Samad, Suresh Singh Wangjam, Udanta Singh.

Forwards: Ishan Pandita, Lallianzuala Chhangte, Manvir Singh, Rahul Kannoly Praveen, Sunil Chhetri, Vikram Partap Singh.



Cooch Behar Trophy 2023-24 Plate Group final Nagaland aser Meghalaya na tsünga asaya tanabuba Nagaland team-i run 23 yanglur mezüngbuba innings run 275 nung tembangogo.

BILEMDANGANG

"Tesüba maparentem agi na alenita teyudaktsü."